

გახსენება

აჭარის საარქივო სამმართველომ დიდი დანაკლისი განიცადა. გარდაიცვალა არქივისტების შესანიშნავი წარმომადგენელი, ღირსებისა და აჭარის ავტონომიური რესპუბლიკის მედლების კავალერი, უღალატო მეგობარი, გაჭირვებულთა ქომაგი და ტკივილთმოზიარე ელგუჯა ჩაგანავა.



ელგუჯა ჩაგანავა დაიბადა ბათუმში 1950 წლის 29 თებერვალს, ცნობილი არქივისტების - გრიშა ჩაგანავასა და ლენა ზაქარეიშვილის ოჯახში. დაამთავრა თბილისის სასოფლო-სამეურნეო აკადემია. შრომითი საქმიანობა დაიწყო 1969 წლიდან სალიბაურის სკოლა-ინტერნატში, არქივში, ხელვაჩაურის რაიონის სოფელ სარფის კოლმეურნეობაში აგრონომისა და თავმჯდომარის თანამდებობებზე. 1997 წლიდან იგი საარქივო დაწესებულების თანამშრომელია.



საარქივო დაწესებულებაში მუშაობის დაწყებისთანავე აქტიურად ჩაება დარგის განვითარებისათვის წარმოებულ საქმიანობაში. 1997 წლიდან სათავეში ჩაუდგა საარქივო დეპარტამენტის უწყებათა დოკუმენტების სამეცნიერო-ტექნიკური დამუშავების განყოფილებას, რომლის რეორგანიზაციის შემდეგ დაინიშნა საარქივო სახელმწიფო დეპარტამენტის ტექნიკური დამუშავების სამსახურის ხელმძღვანელად. ამ პოზიციაზე მუშაობის პერიოდში ე. ჩაგანავამ დიდი როლი შეასრულა საარქივო საქმიანობის სტილის, ფორმებისა და მეთოდების დახვეწის, მომავალი არქივისტების აღზრდისა და დაკვალიანების საქმეში.



2006-2009 წლებში ელგუჯა ჩაგანავა მთავრობის საქვეუწყებო დაწესებულება-საარქივო სამმართველოს დაკომპლექტებისა და დოკუმენტების სამეცნიერო-ტექნიკური დამუშავების განყოფილების მთავარი სპეციალისტია. სწორედ ამ პერიოდში, მისი უშუალო ინიციატივით მოხდა ახალი საარქივო მასალების შემოტანა, გამოჩენილ მოღვაწეთა პირადი ფონდებით არქივის ფონდსაცავების გამდიდრება. ამავე საქმიანობას აგრძელებს იგი ტერიტორიულ ორგანოებთან მუშაობისას.



2010 წლიდან 2017 წლამდე ე. ჩაგანავა საარქივო სამმართველოს ჯერ ადმინისტრაციას, შემდეგ კი აპარატს ჩაუდგა სათავეში. 2017 წლიდან სათავეში ედგა საარქივო სამმართველოს ანალიტიკურ-მეთოდოლოგიურ და ტერიტორიულ ორგანოებთან მუშაობის სამსახურს.

ე. ჩაგანავა აქტიურად იყო ჩართული სამეცნიერო საქმიანობაში. არქივისტებისათვის საყოველთაოდ იყო ცნობილი ელგუჯა ჩაგანავას სახელი. მას კარგად იცნობენ დედაქალაქშიც. მისი ნაშრომები ქვეყნდებოდა სხვადასხვა სამეცნიერო გამოცემებში, იყო საარქივო სამმართველოს ჟურნალ „არხეონის“ სარედაქციო საბჭოს წევრი, ათობით სამეცნიერო ნაშრომის ავტორი. 2023 წელს, გარდაცვალებამდე ორიოდე თვით ადრე, აპრილში მისი ავტორობით გამოიცა წიგნი „აჭარის არქივისტები“.

ე. ჩაგანავას ღვაწლი და დამსახურება საარქივო საქმის განვითარების საქმეში აღნიშნა სამთავრობო ჯილდოებითა და სიგელებით. 2002 წელს იგი დააჯილდოვეს ღირსების მედლით, 2023 წ. აპრილში კი, აჭარის საარქივო სამმართველოს 100 წლისთავის დღეებში ე. ჩაგანავა დაჯილდოვდა აჭარის ავტონომიური რესპუბლიკის მედლით.

